




Stiftung für eidgenössische Zusammenarbeit
Fondation pour la collaboration confédérale
Fondazione per la collaborazione confederale
Fundaziun per la collavuraziun federala



FÖDERALISMUSPREIS
PRIX DU FÉDÉRALISME
PREMIO PER IL FEDERALISMO
PREMI DA FEDERALISSEM

10
JAHRE
ANS
ANNI
ONNS

Ils 6 da settember 2023

Communicaziun a las medias

Il Campus per la democrazia survegn la trofea Premi da federalissem

Il Campus per la democrazia, en spezial la coordinaziun dal di Di internaziunal da la democrazia en Svizra, è vegnì undrà quest onn cun il Premi da federalissem. Ier ha la Fundaziun ch surdà la trofea a Berna.

La festividad ha gì lieu en la Chasa dals chantuns. Florence Nater, cussegliera guvernativa e presidenta da la Fundaziun ch, ha surdà la trofea per mauns da tut la squadra a Carol Schafroth, la directura dal Campus per la democrazia.

«Grazia a Vossa lavur perseveranta e premurada e grazia a Vossa grondiusa rait che Vus avais stabilì cuntinuadamain en il decurs dals ultims onns avais Vus gidà a rinforzar il federalissem en noss pajais cun construir punts tranter la populaziun e las instanzas politicas. A Vus èsi reussì da metter bler en moviment e da porscher ina furmaziun politica attractiva», ha Florence Nater, presidenta da la giuria, declarà en sia laudatio.

Il [Campus per la democrazia](#), fundà da la Fundaziun Dialog, ha sviluppà ina plattafurma naziunala per la furmaziun e la participaziun politica. A maun da differents projects collescha questa plattafurma las acturas ed ils acturs respectivs, procura per lur visibilitad ed als metta a disposiziun utensils (dossiers tematics, basas generalas, projects).

Dapi il 2021, mintgamai ils 15 da settember, renda il Campus per la democrazia pli visibel il Di internaziunal da la democrazia e coordinescha las acziuns en Svizra. La finamira è da motivar umans da tut il pajais da preschentar projects participativs (discussiuns, exposiziuns, lavuratoris). Per sa gidar cun la preparaziun vegnan organisads via la plattafurma inscunters regiunals. Silsuenter vegnan ils projects publitgads sin la website. L'onn passà han ins uschia realisà passa 100 occurrenz.

Menziun speziala da Constitutio

La giuria ha suttastritgà la qualitad dal project [Constitutio](#) e l'engaschi da ses inziants, il fotograf e cineast Dominic Büttner, cun far menziun speziala dad el. Il project vul dar ina fatscha als 195 artitgels da la Constituziun federala svizra – che festivescha il 2023 il giubileum da 175 onns – cun laschar preleger quels en tut las quatter linguas naziunalas da personas enconuschentas e betg enconuschentas.

Il Premi da federalissem festivescha il giubileum da 10 onns. El distingua personas ed organisaziuns per lur engaschi politic, civil, scientific u cultural en favur dal federalissem e da la coesiun naziunala. Anteriusas instituziuns u personas premiadas èn il Forum per l'italiano in Svizzeria, easyvote, il Circus Knie ubain l'anterieur cusseglier federal Arnold Koller. L'appel public d'inoltrar candidaturas e nominaziuns per l'ediziun 2024 vegn lantschà ils 24 d'october.

Las fotografias da l'occurrenza chattais Vus [qua](#).

La trofea ha concepì e realisà l'artist basileis [Florian Graf](#).

Contact ed infurmaziuns

Florence Nater, cussegliera guvernativa, presidenta da la Fundaziun ch (032 889 68 00)

Claudia Appenzeller-Winterberger, manadra sectur Fundaziun ch, c.appenzeller@chstiftung.ch
(031 320 30 14)

La Fundaziun ch – ina fundaziun per ils chantuns

La Fundaziun ch per la collavuraziun federala è in'organisaziun interchantunala e vegn purtada dals 26 chantuns. Ella promova il federalissem, la chapientscha vicendaivla da las cuminanzas linguisticas e da las culturas sco era la collavuraziun dals chantuns e da la Confederaziun.